

6 SEN, 6.5 SEN

■ PNB isytihar agihan pendapatan bagi ASM, ASB 2

Sri Ayu Kartika Amri
kartika@hmetro.com.my

Kuala Lumpur

Permodalan Nasional Berhad (PNB) mengisytiharkan pengagihan pendapatan Amanah Saham Malaysia (ASM) dan Amanah Saham Bumiputera 2 (ASB 2), masing-masing sebanyak 6 sen dan 6.5 sen seunit bagi tahun kewangan berakhir 31 Mac 2017.

Sehingga 28 Februari 2017, ASM mencatatkan pendapatan kasar sebanyak RM1.2 bilion manakala ASB 2 merekodkan RM349.8 juta.

Pengerusi PNB Tan Sri Abdul Wahid Omar berkata, pengagihan pendapatan ASM membabitkan jumlah pembayaran kira-kira RMI bilion yang akan meman-

faatkan lebih 500,000 pemegang unit yang kini memegang 17.3 bilion unit.

Menurutnya, agihan pendapatan ASB 2 pula membabitkan pembayaran sebanyak RM384.7 juta yang akan memberi

manfaat kepada lebih 200,000 pemegang unit yang kini memegang 7.4 bilion unit.

“Pengiraan pengagihan pendapatan bagi ASM dan ASB 2 adalah berdasarkan purata baki pegangan minimum sepanjang tahun kewangan masing-masing.

“Pengagihan pendapatan ASM dan ASB 2 akan dilaburkan semula sebagai unit tambahan ke dalam

akaun pemegang unit pada harga RM1 seunit yang akan dikreditkan secara automatik ke dalam akaun pemegang unit pada 1 April 2017,” katanya pada taklimat media Ulasan Prestasi 2016 dan Maklumat Terkini 2017

PNB di sini, semalam.

Hadir sama, Presiden dan Ketua Eksekutif Kumpulan PNB Datuk Abdul Rahman Ahmad.


Abdul Wahid berkata, PNB turut mengumumkan pengagihan pendapatan bagi ketiga-tiga dana di bawah Amanah Saham Gemilang (ASG) dengan jumlah sebanyak RM138 juta yang akan memberi manfaat kepada lebih 140,000 pemegang

unit yang melanggan 3.1 bilion unit.

Beliau berkata, ASG-Pendidikan, ASG-Kesihatan dan ASG-Persaraan masing-masing merekodkan agihan pada kadar 4.50 sen, 4.25 sen dan 5.15 sen seunit masing-masing.

Pembayaran agihan pendapatan ketiga-tiga dana akan dilaburkan semula secara automatik dalam bentuk unit dan dikreditkan ke dalam akaun pemegang unit pada 1 April 2017.

PNB komited memperkasa inisiatif celik kewangannya bagi mendidik orang ramai mengenai pelaburan dan perancangan kewangan menerusi penganjuran Minggu Saham Amanah Malaysia, Seminar Pelaburan 360 Hari, Kuiz Pelaburan PNB dan Kelab Pelaburan Bijak PNB.



ABDUL Wahid (kanan) dan Abdul Rahman ketika Ulasan Prestasi 2016 dan Maklumat Terkini 2017 PNB di Kuala Lumpur, semalam.